

ՏԱՎՈՒՇ ԲԵՐԴԸ

Քանայի քառեր – Տավուշ բերդ, Տավուշ գավառ, Ուտի գավառ, Սմբատ Ա, Աշոտ Բ, Յիկ Ամրամ, Աբաս Կյուրիկյան, Վանական վարդապետ, Մոլար նոյին, Գրիգոր Ակներցի

Տավուշ բերդը զարգացած ավատատիրության ժամանակաշրջանի Հայաստանի պաշտպանական համակարգի հզոր ու նշանավոր ամրություններից է: Ի տարբերություն իր ժամանակ կառուցված շատ այլ բերդերի և ամրոցների՝ նրա տեղադրությունը վստահաբար հայտնի է: Գտնվում է Տավուշի մարզի Բերդ քաղաքի հարավարևելյան կողմում: Տավուշի միջնաբերդը զբաղեցնում է համանուն գետի արևելյան ափին վեր խոյացող քարաժայռի գագաթը: Միջնաբերդի և ստորին պարիսպների հյուսիսային որոշ հատվածներ դեռևս պահպանվում են: Սակայն, ցավոք, միջնաբերդի պարիսպների քայքայումը վերջին տարիներին արագանում է և աստիճանաբար սպառնալից բնույթ կրում:

Խնդրո առարկա ամրության մասին պատմիչներից առաջինը հիշատակել է Հովհաննես Դրասխանակերտցին՝ իբրև «զամրոցն Տաւրշոյ»¹: Հետագա սկզբնաղբյուրներում Տավուշը վկայվում է թե՛ իբրև ամրոց, թե՛ որպես բերդ և անգամ՝ դղյակ: Նրա անվան ծագումը ճշգրտելուն նպաստում են պատմիչի ոչ միայն վերոբերյալ, այլև «ձորն Տաւրշոյ»² հաղորդումները: Քանի որ Տավուշ գավառը ներառել է ոչ թե մեկ, այլ երեք ձոր, որոնցով հոսում են Ախնջի, Տավուշ և Հախում գետերը, տրամաբանական է ենթադրել, որ պատմիչը նկատի է ունեցել Տավուշ գետի և ոչ թե գավառի ձորը: Եթե այս վարկածը համապատասխանում է իրականությանը, կարելի է ընդունել այն տեսակետը, որ Տավուշ բերդն անվանակոչվել է ոչ թե գավառի, այլ ժամանակին գավառի անունը ստացած գետի անունով:

Տավուշ բերդի շինության ժամանակը և կառուցողի անունը հայտնի չեն: Այդուհանդերձ, Հովհաննես Դրասխանակերտցու մատուցած տվյալները թույլ են տալիս ճշգրտելու դրանք: Անդրադառնալով 850 թ. սկսված հակաարաբական հուժկու ապստամբությունը ճնշելու նպատակով 852 թ. մեծ զորքով Հայաստան ուղարկված Բուղա զորավարի գործողություններին՝ պատ-

¹ Հովհաննու կաթողիկոսի Դրասխանակերտցույ Պատմութիւն Հայոց, Թիֆլիս, 1912, էջ 321 (այսուհետև՝ **Հովհաննես Դրասխանակերտցի**):

² Նույն տեղում, էջ 321:

միջը մասնավորապես գրում է, որ նա «երթեալ ըմբռնէ զմեծ իշխանն Ատրնէրսեհ, որ բնակեալ էր յամրոցին Խաչենոյ և զայլ ևս զհամագգիս նորա: Եւ անտի չուեալ զնայ ի գաւառն Գարդմանայ՝ և պատնէշ և պաշարումն շուրջ Գարդման բերդին եղեալ ըմբռնէ անդի և զիշխանն Գարդմանայ զԿտրիճն ի կալանս կապանաց արկեալ: Եւ անտի ևս չուեալ յՈւտի գաւառ՝ ձերբակալ ի Տուս գիւղ առնէ զՍտեփաննոս, որում և Կոն անուանէին զնա»¹: Ստեփանոս Կոնի ձերբակալությունը փաստում է նաև նրան «զիշխանն Սեւորդեաց» կոչած Ասողիկ պատմիչը²:

Ինչպես տեսնում ենք, ի տարբերություն համապատասխանաբար Խաչեն ամրոցին և Գարդման բերդին ապավինած Ատրնէրսեհ ու Կտրիճ իշխանների, Ստեփանոս Կոնը գտնվել է անպաշտպան Տուս գյուղում, որն ակնհայտորեն եղել է նրա իշխանանիստը: Տուսը Բերդ համայնքի Տավուշ գյուղն է, որը գտնվում է Տավուշ բերդից ընդամենը չորս կիլոմետր հեռավորության վրա: Այս հանգամանքը փաստում է, որ այդ ժամանակ, այն է՝ IX դ. կեսերին, Տավուշ բերդը դեռևս գոյություն չի ունեցել:

Անդրադառնալով Սմբատ Ա-ի (890-914) գործունեությանը՝ Հովհաննես Դրասխանակերտցին ի մասնավորի գրում է, որ նա «առեալ և յինքն ... զՈւտի գաւառ մինչև ի քաղաքն Հունարակերտ և մինչև ի Տուս և ի Շամքոր»³: Դրանից անմիջապես հետո պատմիչն անթվական հիշատակում է Դվինի 893 թ. ահեղ երկրաշարժը՝ բավարարվելով «զայսու ժամանակաւ»⁴ նշումով: Դրանից հետևում է, որ մասնավորապես Ուտի գավառում Սմբատ Ա-ի գործողությունները տեղի են ունեցել այդ երկրաշարժից քիչ առաջ: Հովհաննես Դրասխանակերտցին, Ուտի գավառ ասելով, հետին թվով նկատի է ունեցել ամենայն հավանականությամբ 915/916 թ. ստեղծված արքունապատկան վարչամիավորը: Այն ընդգրկել է Ուտիքի Տավուշ և Աղուէ, ինչպես նաև Գուգարքի Ձորոփոր գավառները⁵: Պատմիչի կողմից այս անգամ ևս Տուսի հիշատակումը, իսկ Տավուշի լրության մատնումն անուղղակիորեն փաստում են, որ նաև այդ ժամանակ, առնվազն մինչև Դվինի վերոհիշյալ երկրաշարժը, Տավուշ բերդը դեռևս կառուցված չի եղել:

Տավուշ բերդի 921 թ. գոյություն ունենալը և դրան նախորդած տասնամյակում երկրի ծայրահեղ ծանր վիճակը թույլ են տալիս վստահորեն պնդել, որ այն կառուցել է Սմբատ Ա-ն IX դ. վերջին տասնամյակի կեսերից X դ. առաջին տասնամյակի վերջերն ընկած ժամանակահատվածում, երբ երկրի

¹ Հովհաննես Դրասխանակերտցի, էջ 127:

² Մատենագիրք Հայոց, ԺԵ հատոր, Ժ. դար, Պատմագրություն, երկու գրքով, գիրք Բ, Երևան, 2011, էջ 708:

³ Հովհաննես Դրասխանակերտցի, էջ 161:

⁴ Նույն տեղում, էջ 162:

⁵ Տե՛ս Շահնազարյան Ա., Ուտի գավառը // «Բանբեր հայագիտության» (այսուհետև՝ «Բ Հ»), 2020, թիվ 2, էջ 28:

վիճակը համեմատաբար բարվոք էր: Այսպիսով, այդ բերդի կառուցապատման համար պահանջվել է շուրջ 15 տարի: Խնդրո առարկա ամրությունը հնագիտորեն առաջինը հետազոտած Հ. Եսայանն իր հերթին նրա երրորդ շինարարական հորիզոնը թվագրել է IX-X դարերով¹, ինչը չի հակասում տղերիս հեղինակի առաջարկած թվագրությանը:

Տավուշ բերդի կառուցմամբ Սմբատ Ա-ն նպատակ է ունեցել ամրացնել իր իշխանությունը Հովհաննես Դրասխանակերտցու բնորոշմամբ «ելուզակուտ»² բնակչությամբ Ուտի գավառում և հզորացնել Հայաստանի հյուսիսային սահմանների պաշտպանական համակարգը:

Հովհաննես Դրասխանակերտցին այդ բերդը հիշատակել է Աշոտ Բ-ի (914-928) դեմ Յլիկ Ամրամի 921 թ. բարձրացրած ապստամբության առիթով: Վերջինիս Աշոտն «էր կացուցեալ... հրամանատար ի վերայ գործոյ աշխարհին»³, այսինքն՝ Ուտի գավառի կառավարիչ: Այն, որ իբրև այդպիսին Յլիկ Ամրամը պետք է ամրակուտ նստավայր ունենար, կասկածից վեր է: Սակայն պատմիչը դրա անունը չի տալիս բավարարվելով հիշատակությամբ առ այն, որ Յլիկ Ամրամը, պատրաստվելով ապստամբության, «առձեռն պատրաստ զամրոցն Տաւրշոյ առեալ՝ ի նմա ամրապահեստ առնէր զընտանիս տուն իւրոյ»⁴:

Պատմիչի հաղորդածի անորոշությունը հնարավորություն չի ընձեռում միանշանակ պատասխան տալու Տավուշ բերդը Յլիկ Ամրամի նստավայրը լինելու կամ չլինելու հարցին: Կա երկու տարբերակ: Չի բացառվում, որ Հովհաննես Դրասխանակերտցին «առեալ» բառն օգտագործել է նրա ոչ թե «գրավել», այլ մյուս՝ «հափշտակել» իմաստով⁵: Այն է՝ նա Յլիկ Ամրամի կողմից նրա գերակա Աշոտ Բ-ին դավաճանելը, վերջինիս պատկանող բերդը միանձնյա տնօրինելը հափշտակություն, այլ ոչ թե գրավում է որակել: Նաև հնարավոր է, որ Յլիկ Ամրամի նստավայրն այլ ամրություն է եղել, սակայն Տավուշի պարիսպների ամրությանը վստահելով՝ նա իր ընտանիքն այդտեղ է փոխադրել: Իրականությանն ավելի մոտ է առաջին տարբերակը, բայց ոչ անվարան պնդելի, ինչպես վարվել է Ռ. Մաթևոսյանը: Ըստ նրա՝ Ուտիի «գավառապետի նստավայրը Տավուշ բերդն էր, նրանցից հանվանե Դրասխանակերտցին հիշատակում է Մովսեսին և Յլիկ Ամրամին»⁶:

Չնայած Հովհաննես Դրասխանակերտցու լռությանը՝ Յլիկ Ամրամի ապստամբությունը ձախողվեց, և Ուտի վարչամիավորը նրա տարածքում

¹ Տե՛ս Եսայան Հ., Մադումյան Ս., Շահնազարյան Ա., Տավուշ ամրոցի պեղումները // «ԼՀԳ», 1991, թիվ 2, էջ 132:

² Հովհաննես Դրասխանակերտցի, էջ 140:

³ Նույն տեղում, էջ 320:

⁴ Նույն տեղում, էջ 321:

⁵ Տե՛ս Նոր բառգիրք հայկազեան լեզուի, հ. առաջին, ի Վենետիկ, 1836, էջ 309:

⁶ Մաթևոսյան Ռ. Բ., Տաշիր-Ձորագետ (X դ.-XII դ. սկիզբ), Երևան, 1982, էջ 54:

գտնվող բերդերով, այդ թվում Տավուշով հանդերձ, շարունակեց մնալ արքունապատկան: Սակայն, ի տարբերություն Աղուէի ու Ձորոփորի, Տավուշ գավառն ու բերդը հետագայում չընդգրկվեցին Բագրատունիների կրտսեր ճյուղերից Կյուրիկյանների 981 թ. ստեղծած թագավորության կազմում: Դրանք շարունակում էին պատկանել այդ տոհմի ավագ Անիի ճյուղին: Այդ են փաստում տարբեր սկզբնաղբյուրներ¹, որոնց հաղորդումների նույնականությունը բացառում է հակառակը պնդելու հնարավորությունը: Ուստի Տավուշ գավառը, հետևաբար նաև բերդը, դեռևս 966 թ. Կյուրիկյաններին տրվելու Ռ. Մաթևոսյանի կարծիքը² սկզբնաղբյուրներով չի հիմնավորվում: Ընդհակառակը, Վարդան վարդապետը Գագիկ Ա-ից (990-1020) հետո Հովհաննես Մմբատին (1020-1041) անցած գավառների թվում հիշատակում է նաև Տավուշը³:

Ըստ Տավուշ բերդի 1988 թ. պեղումների ժամանակ հայտնաբերված մի հնգատող արձանագրության՝ ստորին բերդում 1019 թ. կառուցվել է Սուրբ Աստվածածին անունը կրող եկեղեցի, որի մնացորդները պահպանվել են:

Խնդրո առարկա բերդը Տավուշ գավառի հետ 1045 թ.՝ Անիի Բագրատունյաց թագավորության անկումից հետո, ընկավ Բյուզանդիայի տիրապետության տակ⁴: Հյուսիսային Հայաստանում վրաց արքա Դավիթ IV Շինարարի (1089-1125) նվաճումների առնչությամբ Վարդան վարդապետը գրել է, որ նա գրավել էր «և Գագ, և զՏերունականն և զՏայուշ և Կյեան, և զԼօռի և զՏաշիր և զՄահկանաբերդ և զբոլոր իշխանութիւն Հայոց Կիւրիկէի և Աբասայ»⁵: Քանի որ սկզբնաղբյուրներում իբրև թագավոր առաջին անգամ 1050 թ. հիշատակվող Կյուրիկե Ա-ի կողմից Տավուշ գավառին ուժով տիրելու հնարավորությունը բացառվում էր, ինքնին հասկանալի է, որ նա այն Տավուշ բերդով հանդերձ ստացել էր Բյուզանդիայից: Դա պայմանավորված էր Տաշիր-Ձորագետի թագավորությունը Բյուզանդիայի քաղաքական ազդեցության ոլորտում հայտնվելով: Բերդ համայնքի Արժվաբերդ գյուղում 2020 թ.

¹ Տե՛ս Հավաքումն պատմութեան Վարդանայ վարդապետի լուսաբանեալ, ի Վենետիկ, 1862, էջ 90 (այսուհետև՝ **Վարդան վարդապետ**), Պատմութիւն նահանգին Միսական արարեալ Ստեփաննոսի Օրբէլեան արքեպիսկոպոսի Միւնեաց, Թիֆլիս, 1910, էջ 300 (այսուհետև՝ **Ստեփանոս Օրբելյան**), Մանր ժամանակագրություններ XIII-XVIII դդ., հ. I, կազմեց Վ. Ա. Հակոբյան, Երևան, 1951, էջ 384:

² Տե՛ս **Մաթևոսյան Ռ. Ի.**, Բագրատունյաց Հայաստանի պետական կառուցվածքն ու վարչական կարգը, Երևան, 1990, էջ 136:

³ Տե՛ս **Վարդան վարդապետ**, էջ 92:

⁴ Ռ. Մաթևոսյանը, հղելով Վարդան վարդապետի վերը նշված աշխատության վենետիկյան հրատարակության 99-րդ էջը, գրել է, որ Գրիգոր Մագիստրոսը 1045 թ. հետո՝ Միջագետք մեկնելուց առաջ, իր տիրությունների հետ նաև Աղստևի հովիտն ու Տավուշն է հանձնել Բյուզանդիային (տե՛ս **Մաթևոսյան Ռ. Ի.**, Տաշիր-Ձորագետ (X դ.-XII դ. սկիզբ), էջ 127): Սակայն այդ էջում Վարդան վարդապետը գրում է միայն Աղստևի հովտում գտնվող Կայանն ու Կալծանը, ինչպես նաև Բջնին նրա կողմից Բյուզանդիային հանձնվելու մասին:

⁵ **Վարդան վարդապետ**, էջ 119:

հայտնաբերված՝ բյուզանդական կայսր Կոստանդին X Դուկասի (1059-1067) դրամը դրա ապացույցն է:

Շատ չանցած՝ 1088 թ., Կյուրիկե Ա-ն ստիպված էր հպատակվել սելջուկներին և դառնալ Գանձակի սելջուկյան մալիքության անմիջական հպատակը: Դրանից հետո Տաշիր-Ձորագետի թագավորությունը, տարածքային կորուստներ կրելով, գրկվեց նաև Տավուշ գավառից ու բերդից, որոնք անցան այդ մալիքությանը: Մյուս կողմից այդ թագավորության վրա աստիճանաբար ուժեղանում էր նաև վրացական ճնշումը:

Ի վերջո, ըստ Կիրակոս Գանձակեցու՝ Կյուրիկե Ա-ից հետո նրա որդիներ Աբասն ու Դավիթը «դաւեալք ի վրաց, ելեալք ի տանէ հայրենեաց, գնացին ի պարսիկս... և առնուն ի նոցանէ ի ժառանգութիւն զՏաւուշ, զՄաճնաբերդ և զայլ տեղիս»¹: «Ի պարսիկս» արտահայտությամբ պատմիչը նկատի ունի Գանձակի սելջուկյան մալիքությունը: Այսպիսով, վստահաբար Տավուշ ու Մաճնաբերդ բերդերը 1113 թ. իրենց շրջակայքով անցան համապատասխանաբար Աբաս և Դավիթ Կյուրիկյաններին²: Տավուշ բերդը դարձավ իր շրջակայքը ներառող համանուն իշխանության կենտրոնը:

Շատ չանցած, 1124 թ. զարնանն ու ամռանը³, ինչպես վերը նշվեց, Դավիթ IV Շինարարը Հյուսիսային Հայաստանում կատարեց մի շարք նվաճումներ: Արդյունքում Տաշիր-Ձորագետի Կյուրիկյան նախկին թագավորության տարածքը նա խլեց սելջուկներից: Արդեն տեսանք, որ ըստ Վարդան վարդապետի՝ վրաց թագավորի գրաված բերդերի թվում էր նաև Տավուշն իր շրջակայքով: Դա հավաստում է նաև Ստեփանոս Օրբելյանը⁴: Սակայն Առանի կառավարիչ (աթաբեկ) Կարա-Սոնկարը (1127-1140/1141), չհամակերպվելով Դավիթ IV Շինարարի գրաված տարածքները կորցնելու հետ, նրա հաջորդ Դեմետրե Ա-ի (1125-1155/1156) դեմ պայքար սկսեց դրանք վերադաձնելու համար: Փոփոխական հաջողություններով ընթացած այդ պայքարն ավարտվեց 1130-ական թվականների վերջերին՝ Կարա-Սոնկարի հաղթանակով: Այսպիսով, Տավուշի Կյուրիկյան իշխանությունը Տավուշ բերդով հայտնվեց Գանձակի սելջուկյան մալիքության գերակայության տակ:

Այդ ժամանակաշրջանում Տավուշ բերդում Հայ Աղվանից եկեղեցու գործունեության ասպարեզում տեղի ունեցավ մի կարևոր իրադարձություն: Այնտեղ 1139 թ. տրե ամսին (մայիսի 15-հունիսի 11) կայացավ ժողով, որի որոշմամբ այդ եկեղեցու ութ տարի թափուր մնացած կաթողիկոսական

¹ Կիրակոս Գանձակեցի, Պատմություն հայոց, աշխատասիրությամբ Կ. Ա. Մելիք-Օհանջանյանի, Երևան, 1961, էջ 151-152 (այսուհետև՝ Կիրակոս Գանձակեցի):

² Թվականի ճշտումը տե՛ս Ծանոթագրեան Ա., Տաշիր-Ձորագետի Կիրիկեան թագավորութեան ճգնաժամն ու անկումը // «Հանդէս ամսօրեայ», 2004, թիվ 1-12, սյունակ 297:

³ Տե՛ս Մարգարյան Հ. Գ., Հյուսիսային Հայաստանի ու Վրաստանի ԺԲ դարի պատմության մի քանի հարցեր, Երևան, 1980, էջ 90-92:

⁴ Տե՛ս Ստեփանոս Օրբելյան, էջ 379:

աթոռը զբաղեցրեց Գրիգորիս Բ-ն (1139-1145): Ժողովը գլխավորում էր Հայոց Արևելից կողմանց երևելի վարդապետներ Դավիթ Ալավկաորդու, Թոքակերի որդի Գրիգորի և այլոց խնդրանքով Հայոց կաթողիկոս Գրիգոր Գ Պահլավունու (1113-1165) կողմից այնտեղ ուղարկված Կարինի եպիսկոպոս Սահակը: Այս իրադարձությանն անդրադարձած, բայց ժողովի կայացման տեղն ու ժամանակը չնշած Կիրակոս Գանձակեցուն լրացնում է Մխիթար Գոշը: Ըստ նրա՝ «Ի ՇՁԸ թուակ. Հայոց (1139 թ. – Ա. Շ.) ի գալ տեր Սահակայ յաշխարհս Աղուանից, ժողովէր զամենեսեան առ հասարակ ի տուն թագաւորին Աբասայ Բագրատունոյ՝ որդւոյ Կիրիկէի արքայի, որ եւ ժողովեալ ամենեցուն առաջին նորա ի բերդն, որ կոչի Տաւուշ ուր եւ ժողովեալ հարանց սրբոց եւ եպիսկոսաց. թագաւորն Դավիթ՝ եղբայր Աբասայ թագաւորի»¹:

Ժողովից քիչ անց՝ 1139 թ. արեգ ամսին (սեպտեմբերի 13-հոկտեմբերի 10), տեղի ունեցավ Գանձակի ուժգին երկրաշարժը, որը պատուհասեց նաև Տավուշ գավառը: Ավերվեց նաև Տավուշ բերդի վերը հիշատակված Սուրբ Աստվածածին եկեղեցին: Այն ի հիշատակ իր և Դավիթ եղբոր հոգու Աբասը նախքան 1144 թ. նորոգեց²:

Օգտվելով Կարա-Սոնկուրից հետո նրա տնօրինած շրջանների խառնակ ու անտերունչ վիճակից՝ Պարսկաստանից եկած Չավլի զորապետը սկսեց ապստակել դրանք: Նա մի շարք վայրեր, այդ թվում Խաչենը 1143 թ. ասպատակելուց հետո, ըստ Մխիթար Գոշի՝ «ի միուսում ամին դարձեալ գայր ի գաւառս Առանայ: Եւ փութանակի երթայր ի բերդն Տավուշ յորում ամրացեալ էր թագաւորն Աբաս, և բազում ջանիւ ընդ երկար պաշարեալ գնա՝ ապա առնոյր զբերդն. իսկ Աբաս անցեալ գնաց առ թագաւորն Վրաց ի ՇՂԴ թուականին»³: Այսպիսով, ըստ Մխիթար Գոշի՝ Չավլին Տավուշը գրավել է 1144 թ.՝ երկարատև պաշարումից հետո: Այս իրադարձությանն անդրադարձել է նաև Սամվել Անեցին: Սակայն նա Տավուշի գրավումը թվագրել է 1145 թվականով, նաև նշել, որ դա տեղի է ունեցել քառասնօրյա պաշարումից հետո⁴: Դեպքերի հետագա զարգացումից հետևում է, որ ճիշտ է Մխիթար Գոշի առաջարկած թվականը⁵: Չավլին Տավուշը գրավեց՝ «հանելով զթագաւորն Աբաս առանց վնաս առնելոյ»⁶, և նա ապաստանեց Մաճնաբերդում՝ Դավիթ եղբոր մոտ⁷:

¹ Մովսես Կաղանկատուացի, Պատմութիւն Աղուանից աշխարհի, քննական բնագիրը և ներածությունը՝ Վարազ Առաքելյանի, Երևան, 1983, էջ 351 (այսուհետև՝ Մովսես Կաղանկատուացի):

² Տե՛ս Եսայան Հ., Մաղումյան Ս., Շահնագարյան Ա., նշվ. աշխ., էջ 136-140:

³ Մովսես Կաղանկատուացի, էջ 353:

⁴ Տե՛ս Մամուկ Անեցի և շարունակողներ, Ժամանակագրություն, աշխատասիրությամբ Կարեն Մաթևոսյանի, Երևան, 2014, էջ 213 (այսուհետև՝ Մամվել Անեցի և շարունակողներ):

⁵ Չավլիի կողմից Տավուշ բերդի գրավման թվականի ճշգրտումը տե՛ս Շահնագարյան Ա., Տավուշի Կյուրիկյան իշխանությունների պատմությունից // «Էջմիածին», 2017, թիվ Ժ, էջ 110-111:

⁶ Մամվել Անեցի և շարունակողներ, էջ 213:

⁷ Տե՛ս Կիրակոս Գանձակեցի, էջ 152:

Գրիգոր Ակներցու «գամուր դղեկն զՏաուշ, որ էր աթոռ Սուլթանի»¹ վկայությունից հետևում է, որ այդ բերդի գրավումից հետո Աբաս Կյուրիկյանի իշխանությունը վերացվեց, և նրա տեղում ստեղծվեց սելջուկյան սուլթանություն՝ իր տիրոջ նստավայր ունենալով Տավուշ բերդը: Այդ վարչական միավորը գոյություն ունեցավ մինչև 1203 թ., երբ ըստ «Վասն անցեալ աւուրցն» խորագրով ժամանակագրական մանր հատվածի²՝ Տավուշ բերդն ազատագրվեց Ջաքարյանների կրտսեր ճյուղը ներկայացնող իշխան Բլուզ Ջաքարե Վահրամյանի կողմից:

Այսպիսով Տավուշ բերդը և գավառն ընգրկվեցին վրացական թագավորության կազմում գտնվող Վահրամյանների հզոր իշխանության մեջ:

Դեռևս Բագրատունյաց շրջանում նկատելի էր բերդն իր շրջակա տարածքով գավառ կոչվող վարչամիավոր կազմելու և այն դրա կենտրոն դարձնելու սկզբունքը³: Հաղբատի վանական համալիրում իր վաղամեռիկ եղբայրների հիշատակին Բլուզ Ջաքարեի տիկին Խաթուն իշխանուհու կառուցված եկեղեցու պատին նրա թողած 1205/1206-1215/1216 միջակայքով թվագրվող արձանագրությունից հետևում է, որ այդ ժամանակ ևս նույն սկզբունքն էր գործում: Խաթունը դրանում ամուսնուն ներկայացնում է որպես «տեր Գագա եւ Տաւշո, Գարդմանա եւ Տէրունականին եւ այլոց գաւառաց»⁴:

Այս պնդման օգտին է վկայում նաև Խորանաշատի վանքում 1252 թ. գրչագրված մի ձեռագրի հիշատակարանում առկա «ի գաւառիս Երզնէանք կոչեցեալ»⁵ արտահայտությունը: Թե՛ Տավուշ և թե՛ Երզնէանք բերդերն ընդգրկված էին աշխարհացույցյան Տավուշ գավառում, բայց, ինչպես տեսնում ենք, XIII դ. հանդես են գալիս իբրև դրա տարածքի վրա ստեղծված՝ իրենց անունը կրող գավառի կենտրոններ: Չի բացառվում, որ Տավուշ բերդը Վահրամյանների ենթակայության տակ անցնելուց հետո դարձել է նրանց կողմից ստեղծված և նախկին Տավուշի Կյուրիկյան իշխանության տարածքին համապատասխանող վարչամիավորի կենտրոնը: Տավուշ բերդը կրող քառաժայռի արևմտյան ճակատին պահպանվել է մի տառաշարք՝ «ՈՐԴԹ»⁶: Այն սելջուկյան տիրապետությունից խնդրո առարկա բերդի ազատագրման տարեթիվն է՝ 1205: Տավուշ բերդի Սուրբ Աստվածածին եկեղեցին հիշատակած վերոհիշյալ արձանագրության նման՝ այն փրկչական թվականով է: Իսկ

¹ **Գրիգոր Ակներցի**, Պատմութիւն թաթարաց, Երուսաղեմ, 1974, էջ 23 (այսուհետև՝ **Գրիգոր Ակներցի**):

² Տե՛ս Մանր ժամանակագրություններ XIII-XVIII դդ., էջ 392:

³ Տե՛ս **Շահնազարյան Ա.**, Վահրամյանների իշխանությունը, Երևան, 1990, էջ 133:

⁴ Դիվան հայ վիմագրության, պրակ IX, կազմեցին Ս. Գ. Բարխուդարյան, Կ. Գ. Ղաֆադարյան, Ս. Տ. Սաղումյան, Երևան, 2012, էջ 208:

⁵ Հայերեն ձեռագրերի հիշատակարաններ. ԺԳ դար, կազմեց Ա. Ս. Մաթևոսյան, Երևան, 1984, էջ 264:

⁶ **Ղաֆադարյան Կ.**, Էջեր հայոց միջնադարյան մշակույթի և պատմության, I, Երևան, 2007, էջ 304:

ինչպես հայտնի է՝ դրա համաձայն Քրիստոսի ծնունդը հաշվվում է այժմ գործող թվականից երկու տարի առաջ: 1205 թվականից ավելդիր երկու տարին հանելով ստանում ենք 1203 թ.: Ինչպես արդեն տեսանք, այդ թվականը՝ 1203-ը, տալիս է նաև «Վասն անցեալ աւուրցն» խորագրով վերոբերյալ ժամանակագրական մանր հատվածը:

1203-1229 թթ. Տավուշ բերդը սկզբնաղբյուրներում չի հիշատակվում: Այն չի նշվում նաև 1229 թ. գարուն-ամռանը խորեմշահ Ջալալ ադ-Դինի (1220-1231) կողմից Վահրամյանների իշխանության վրա կատարած պատժիչ արշավանքի ժամանակ պաշարված բերդերի թվում¹: Եվ դա այն դեպքում, երբ նրա հրոսակները ներխուժել էին նաև Տավուշ գավառ և ավերել Խորանաշատի վանքը²: Դրանից հետո Վանական վարդապետն իր սաների հետ նախ ապաստանել էր Տավուշ բերդի հարավակողմում ընկած Լորուտ գյուղի մոտ գտնվող մի քարայրում, ապա դրա մերձակայքում: Դա ևս անուղղակիորեն փաստում է, որ Ջալալ ադ-Դինի հրոսակները Տավուշ բերդ կամ նրա շրջակայք չէին հասել:

Խնդրո առարկա բերդն իր պատմության մեջ երկրորդ և վերջին անգամ պաշարվեց 1236 թ.: Այդ թվականին նվաճման նպատակով հյուսիսարևելյան Հայաստան ներխուժած մոնղոլական բանակի մի ջոկատ զորապետ Մուլար նոյինի գլխավորությամբ մտավ Վահրամյանների իշխանության տարածք: Վրաց արքունիքից օգնություն չստացած նրա իշխան Վահրամ Գագեցին, համոզվելով, որ սեփական ուժերով մոնղոլներին չի կարող հետ մղել, Աղբուղա որդու հետ տեղից տեղ էր փախչում³, մինչև որ ապաստանեց Քութախսում⁴: Դրա հետևանքով նրա իշխանության «ամրոցս, և զգեռոս և զագարակս ամենեքեան տուեալ լինէին ի ձեռս նոցա (մոնղոլների – Մ. Շ.) ի սուղ ժամանակս, անվաստակ և առանց աշխատութեան»⁵: Ինչ վերաբերում է Տավուշ բերդին, ապա այն առանց դիմադրության չէ, որ հանձնվեց: Այդ մասին է վկայում Գրիգոր Ակներցին: Ըստ նրա՝ մոնղոլներն «առին եւ գործով զամուր դդեկն Տավուշ»⁶: Ինչպես տեսնում ենք, Տավուշ բերդն այս անգամ ևս գրավվեց համառ դիմադրությունից հետո միայն: Մոնղոլների կողմից այդ բերդին մերձակա Վանականի քարայրը 1236 թ. վարդավառի օրը՝ հուլիսի 6-ին, պաշարելը⁷ հուշում է, որ այն գրավվել է դրանից քիչ առաջ կամ հետո:

Մոնղոլները ռազմական գործողություններն ավարտելուց հետո՝ 1236 թ. աշնանը, վերադարձան Մուղան՝ իրենց ձմեռանոց: Նախքան այդ նրանք Ղա-

¹ Տե՛ս **Шихаб ад-Дин Мухаммад ан-Насиви**, Жизнеописание султана Джалал ад-Дин Манкбурны, Баку, 1973, с 226□

² Տե՛ս **Կիրակոս Գանձակեցի**, էջ 244:

³ Տե՛ս **Վարդան վարդապետ**, էջ 145:

⁴ Տե՛ս Կարլիս Ծօփրեբա, История Грузии, под. ред. Р. Метревели, Тбилиси, 2008, с. 346□

⁵ **Վարդան վարդապետ**, էջ 145:

⁶ **Գրիգոր Ակներցի**, էջ 23:

⁷ Տե՛ս **Կիրակոս Գանձակեցի**, էջ 245:

րա Բուղա անունով մի գորապետի թողեցին տեղում՝ հանձնարարելով «քա-
կել զամենայն ամուրս երկրին զոր առեալ էին, զոր և քակեցին ի հիմանց զա-
նառիկ բերդսն»¹: Չնայած նրանք իրենց գրաված բոլոր բերդերն ու ամրոցնե-
րը չէ, որ քանդեցին, սկզբնաղբյուրներում հետագայում Տավուշ բերդի հիշա-
տակությունների չգոյությունը և մոնղոլներին դիմադրած լինելը հիմք են
տալիս կարծելու, որ այն նրանց կողմից ավերվել է: Դա են վկայում նաև այդ
բերդի 1986-1988 թթ. շերտագրական պեղումների արդյունքները²: Այսպիսով,
անտարակուսելի է, որ Տավուշ բերդի գոյության ժամանակագրական սահ-
մանները ներառում են IX դ. վերջին տասնամյակի կեսերից մինչև XIII դ. չոր-
րորդ տասնամյակի երկրորդ կեսն ընկած միջակայքը: Հետևաբար, այն
գոյություն է ունեցել շուրջ երեքուկես դար:

Արտաշես Շահնազարյան – Տավուշ բերդը

Տավուշը միջնադարյան Հայաստանի հզոր ու նշանավոր բերդերից է, որը
գտնվում է Տավուշի մարզի Բերդ քաղաքի հարավարևելյան կողմում: Այն վստահա-
բար կառուցվել է Սմբատ Ա-ի կողմից՝ IX դ. վերջին տասնամյակի կեսերից X դ.
առաջին տասնամյակի վերջերն ընկած ժամանակամիջոցում: Տավուշ բերդի կա-
ռուցմամբ Սմբատ Ա-ն երկու նպատակ է ունեցել: Նախ ամրապնդել Հայաստանի
հյուսիսային սահմանների պաշտպանությունը և ապա անհնազանդ Տավուշ գա-
վառը պահել արքունիքի անմիջական հսկողության տակ: Առաջին անգամ հիշա-
տակվում է Աշոտ Բ Երկաթի դեմ Ուտի վարչական միավորի կառավարիչ Յլիկ Ամ-
րամի 921 թ. ապստամբության կապակցությամբ: Տավուշ բերդը մինչև 1045 թ. պատ-
կանել է Բագրատունիներին: Դրանից հետո հաջորդաբար անցել է Բյուզանդիային,
Կյուրիկյաններին, սելջուկներին ու Վահրամյաններին: Այդ ընթացքում եղել է Տա-
վուշ գետի ավազանում ստեղծված Կյուրիկյան համաևուն իշխանության, սելջուկ-
յան սուլթանության, իսկ Վահրամյանների օրոք՝ Տավուշ գավառ վարչական միավո-
րի կենտրոնը: Մոնղոլները 1236 թ. այն գրավել և ավերել են:

Арташес Шахназарян – Крепость Тавуш

Ключевые слова – крепость Тавуш, провинция Тавуш, провинция Ути, Смбат I, Ашот II, Цлик Амрам, Абас Кюрикян, вардапет Ванакан, Молар-ноин

Тавуш являлся одной из мощно укрепленных и значительных крепостей
средневековой Армении. Крепость находилась в юго-восточной части г. Берд Тавушской
области. Она была построена Смбатом I в середине последнего десятилетия IX – конце
первого десятилетия X в. Стрительство крепости Тавуш преследовало две цели. Во-
первых, Смбат I хотел укрепить оборону северных границ Армении, во-вторых, держать
непокорную провинцию Тавуш под непосредственным контролем царского двора.

¹ Տե՛ս Գրիգոր Ակնեցի, էջ 23-24:

² Տե՛ս Եսայան Հ. Ս., Մաղումյան Ս. Ս., Շահնազարյան Ա. Ի., նշվ. աշխ., էջ 132:

Впервые крепость была упомянута в связи с восстанием правителя административной единицы Ути Цлик Амрама против Ашота II в 921 г. До 1045 г. крепость принадлежала царскому роду Багратуни, впоследствии она поочередно переходила к Византии, Кюрикиянам, сельджукам и Ваграмянам. В этот период крепость Тавуш была центром созданного в бассейне реки Тавуш одноименного княжества Кюрикианов, сельджукского султаната, а при Ваграмянах – центром административной единицы провинции Тавуш. Тавушская крепость была разрушена в 1263 г. в результате захвата монголами.

Artashes Shahnazaryan – Tavush Fortress

Key Words – *Ashot II Yerkat, Tslik Amram, Medieval Armenia, Tavush, fortresses, city, governor, sultanate, protection, borders, revolt*

Tavush is one of the powerful and famous fortresses of medieval Armenia. It is located in the southeastern part of Berd city in Tavush Province. It was most probably built by Smbat I during the period between the middle of the last decade of the IX century and the end of the first decade of the X century. With the construction of Tavush Fortress, Smbat I pursued two goals. Firstly, to strengthen the protection of the northern borders of Armenia, secondly, to keep the disobedient Tavush Province under the direct control of the court. The fortresses was first mentioned in connection with the revolt of Tslik Amram, the governor of the Uti administrative unit, against Ashot II Yerkat in 921. Tavush fortress belonged to the Bagratids until 1045. After that, it passed to Byzantium, the Kyurikids, the Seljuks and the Vahramyans. During that period, it was the center of the administrative unit of the Kyurikid Dynasty established in the Tavush river basin, later that of the Seljuk sultanate, and under the Vahramyans it was the center of the Tavush Province administrative unit. It was captured and destroyed by the Mongols in 1236.

Ներկայացվել է 20.01.2022

Գրախոսվել է 07.03. 2022

Ընդունվել է տպագրության 29.03.2022

Արտաշես Շահնազարյան – ՀՀ ԳԱԱ պատմության ինստիտուտի միջին դարերի պատմության բաժնի վարիչ, պատմական գիտությունների թեկնածու, դոցենտ (shahnazaryan1974@inbox.ru)